

REGIONAL NEWS UNIT
ALL INDIA RADIO, AGARTALA

Date: 11-01-2026

Time: 07:55-08:05 PM Hrs

BENGALI EVENING BULLETIN

Headlines :

- (১) মুখ্যমন্ত্রী অধ্যাপক ডা: মানিক সাহা আজ চুড়াইবাড়িতে বিভিন্ন সরকারী প্রতিষ্ঠান পরিদর্শন করেন।
- (২) প্রধানমন্ত্রী নরেন্দ্র মোদি বলেছেন, বিশ্বব্যাপী অনিশ্চয়তার মধ্যে ভারত অভূতপূর্ব নিশ্চিততার পর্যায় প্রত্যক্ষ করছে।
- (৩) ভারতীয় মহাকাশচারী, গ্রুপ ক্যাপ্টেন শুভাংশু শুল্লা, তরুণদের স্থিতিশীল হতে এবং আত্ম-সংশয় থেকে বিরত থাকার পরামর্শ দিয়েছেন।
- (৪) আজ থেকে মোহনপুরে শুরু হয়েছে অটল কাপ ক্রিকেট প্রতিযোগিতা।

CM -NORTH VISIT :

উত্তর জেলা সফরের দ্বিতীয় দিনে আজ সকালে মুখ্যমন্ত্রী অধ্যাপক ডা: মানিক সাহা চুড়াইবাড়ি বিক্রয় কর দপ্তর, পরিবহন দপ্তরের চেকপোস্ট এবং থানা পরিদর্শন করেন। সেখান থেকে তিনি আসাম আগরতলা জাতীয় সড়কের চাঁদপুরে গিয়ে স্থানীয় জনগণের সঙ্গে কথা বলেন। মুখ্যমন্ত্রী ধর্মনগরে কামেশ্বরস্থিত অয়েল ডিপো পরিদর্শন করেন। এরপরে তিনি বিধানসভার অধ্যক্ষ প্রয়াত বিশ্ববন্ধু সেনের বাসভবনে গিয়ে পরিবার-পরিজনদের সঙ্গে কথা বলেন। মুখ্যমন্ত্রীর সঙ্গে ছিলেন উত্তর ত্রিপুরা জিলা পরিষদের সভাধিনেত্রী অপর্ণা নাথ, বিধায়ক যাদব লাল নাথ, জেলাশাসক চাঁদনী চন্দ্রন, জেলা পুলিশ সুপার অবিনাশ রাই প্রমুখ। পরে মুখ্যমন্ত্রী পদ্মপুরে বিজেপির জেলা কার্যালয়ে এক

সভায় যোগ দেন। সভায় অন্যান্যদের মধ্যে উপস্থিত ছিলেন শ্রমমন্ত্রী টিংকু রায়, বিজেপির রাজ্য সভাপতি তথা সংসদ রাজীব ভট্টাচার্য সহ অন্যান্য নেতৃবৃন্দ।

PM-Rajkoat:

প্রধানমন্ত্রী নরেন্দ্র মোদি বলেছেন, বিশ্বব্যাপী অনিশ্চয়তার মধ্যে ভারত অভূতপূর্ব নিশ্চিততার পর্যায় প্রত্যক্ষ করছে। আজ রাজকোটে আয়োজিত কচ্ছ ও সৌরাষ্ট্র অঞ্চলের জন্য দু'দিনের ভাইব্রেন্ট গুজরাট আঞ্চলিক সম্মেলনের উদ্বোধনের পর শ্রী মোদি একথা বলেন। তিনি বলেন, ভারত উন্নত দেশ হওয়ার লক্ষ্যে দ্রুত অগ্রসর হচ্ছে এবং এই লক্ষ্যে অর্জনে সংস্কার গুরুত্বপূর্ণ ভূমিকা পালন করে চলেছে। প্রধানমন্ত্রী শিল্পপতিদের ভারত এবং সৌরাষ্ট্র-কচ্ছ অঞ্চলে বিনিয়োগের আহ্বান জানিয়ে বলেন, বিনিয়োগের জন্য এটাই সঠিক সময়। শ্রী মোদী জানান, কচ্ছ বিশ্বের বৃহত্তম ৩০ গিগাওয়াট ক্লিন এনার্জি পার্ক তৈরি করা হচ্ছে।

#####PM Byte#####

Minister Kishor Barman, Battali:

সোনামুড়ার বটতলিতে ঐতিহ্যবাহী মকর সংক্রান্তি মেলার শেষ পর্যায়ের প্রস্তুতি খতিয়ে দেখলেন উচ্চশিক্ষা মন্ত্রী কিশোর বর্মণ। আগামী মঙ্গলবার দুদিনব্যাপী এই মেলার উদ্বোধন করবেন রাজ্যপাল ইন্দ্রসেনা রেড্ডি নাল্লু। বিধায়ক রামপদ জামতিয়াকে সঙ্গে নিয়ে আজ সকালে মন্ত্রী শ্রী বর্মণ গোমতী নদীর ঘাট সহ মেলা প্রাঙ্গণ ঘুরে দেখেন।

PM- Somnath:

প্রধানমন্ত্রী নরেন্দ্র মোদি দেশবাসীকে ঐক্যবদ্ধ থাকার এবং দেশকে বিভক্ত করার ষড়যন্ত্রকারীদের পরাস্ত করার আহ্বান জানিয়েছেন। আজ গুজরাটের প্রভাস পাটনে সোমনাথ স্বাভিমান পর্ব উপলক্ষে এক সমাবেশে প্রধানমন্ত্রী সোমনাথ স্বাভিমান পর্বকে শাস্বত বিশ্বাস এবং ভক্তির প্রতিফলন হিসাবে বর্ণনা করেন। প্রধানমন্ত্রী বলেন, এই উৎসব নিছক ঐতিহাসিক গৌরবের উদযাপন নয়, বরং সোমনাথ মন্দিরের কালজয়ী যাত্রাকে ভবিষ্যত প্রজন্মের জন্য বাঁচিয়ে রাখার একটি গুরুত্বপূর্ণ সুযোগ।

Book Fair:

আজ ৪৪ তম আগরতলা বইমেলা দশম দিন। আজ সন্ধ্যায় বইমেলা সরোজিনী নাইডু মঞ্চে রাজ্যের প্রখ্যাত শিল্পীগন সাংস্কৃতিক অনুষ্ঠান পরিবেশন করেন। গতকাল বইমেলার নবম দিনে ১৬ লক্ষ ৪৮ হাজার ১৩৩ টাকার বই বিক্রি হয়েছে। বইমেলায় আজ কবি সম্মেলনে পশ্চিম ত্রিপুরা জেলার মোট ৬২ জন কবি অংশগ্রহণ করেন।

এদিন সাইবার নিরাপত্তা, ডাটা সুরক্ষা ও জরুরি পরিকল্পনা বিষয়ক একটি গুরুত্বপূর্ণ আলোচনা সভা অনুষ্ঠিত হয়। সভায় বিস্তারিত আলোচনা করেন অতিরিক্ত পুলিশ সুপার (সাইবার ক্রাইম) নির্দেশ দেব এবং ফরেনসিক সাইবার ডিভিশনের প্রধান বাপি সাহা।

Congress:

প্রদেশ কংগ্রেসের উদ্যোগে আজ আগরতলা সার্কিট হাউজ সংলগ্ন গান্ধীমূর্তির পাদদেশে চার ঘণ্টার অনসন কর্মসূচি পালন করা হয়। কর্মসংস্থান ও আর্থিক নিরাপত্তা নিশ্চিত করতে, এমজিএনরেগা প্রকল্পের নাম পরিবর্তনের সিদ্ধান্তের

বিরুদ্ধে এই কর্মসূচি দেশব্যাপী নেওয়া হয়েছে বলে প্রদেশ কংগ্রেস সভাপতি আশিস কুমার সাহা জানিয়েছেন। বিধায়ক সুদীপ রায় বর্মণ সহ অন্যান্য কংগ্রেস নেতৃত্ব এই কর্মসূচিতে অংশ নেন।

এদিকে, সোনামুড়া জেলা কংগ্রেসের উদ্যোগেও এই কর্মসূচি স্থানীয় কংগ্রেস ভবন প্রাঙ্গণে অনুষ্ঠিত হয়।

Blood Donation Camp -Jolaibari:

স্বাস্থ্য বিভাগীয় রাষ্ট্রবাদী কর্মচারী সংঘের দক্ষিণ জেলা কনভেনশন উপলক্ষে আজ জোলাইবাড়ি কমিউনিটি সভাগৃহে এক রক্তদান শিবির অনুষ্ঠিত হয়। শিবিরে ২৯ জন রক্তদান করেন। সমবায় মন্ত্রী শুল্লাচরন নোয়াতিয়া শিবিরের উদ্বোধন করেন।

CPIM:

সিআইটিইউ সহ বিভিন্ন বামপন্থী ট্রেড ইউনিয়ন, সংযুক্ত কৃষান মোর্চা ও অন্যান্য সংগঠনের উদ্যোগে আজ আগরতলার মুক্তধারা অডিটোরিয়ামে এক কনভেনশন অনুষ্ঠিত হয়। কনভেনশনে সিটু্য রাজ্য সভাপতি মানিক দে সহ অন্যান্য বক্তারা কেন্দ্রীয় সরকারের নীতির ফলে শ্রমিক, কৃষক ও সাধারণ মানুষের জীবন-জীবিকা বিপন্ন হয়ে পড়েছে বলে অভিযোগ করেন। আগামী ১২ ফেব্রুয়ারি দেশব্যাপী ধর্মঘটের সমর্থনে এই কনভেনশনে বিভিন্ন সিদ্ধান্ত গৃহিত হয়।

Yuba Dibas- Sushanta:

বিজেপি'র প্রতাপগড় মন্ডল কমিটির উদ্যোগে আজ এক বাইক রেলি অনুষ্ঠিত হয়। যুব মোর্চার রাজ্য সভাপতি তথা বিধায়ক সুরশান্ত দেব জানান, জাতীয় যুব দিবসকে সামনে রেখে এই বাইক রেলির আয়োজন। প্রতাপগড় মন্ডল সভানেত্রী স্বপ্না দাস সহ দলের কার্যকর্তারা এই রেলিতে অংশ নেন।

Update Akashvani :

এখবর শুনছেন, আকাশবাণী আগরতলা কেন্দ্র থেকে।

#####Sound Byte#####

আকাশবাণীর সংবাদের আপডেট পেতে লগ ইন করুন – ডব্লিউ. ডব্লিউ. ডব্লিউ ডট নিউজ অন এ আই আর ডট কম এবং নিউজ অন এ-আই-আর অ্যাপ, এবং টুইটার ও ফেসবুক প্ল্যাটফর্মে-এ এ-আই-আর-নিউজ-এলার্টস-এ। ইউ-টিউব-এ লক্ষ্য করুন নিউজ-অন-এআইআর-অফিসিয়াল-এ।

এছাড়াও আকাশবাণী আগরতলার সংবাদ আপডেট পেতে দেখুন টুইটার বা এক্স হ্যান্ডলে আকাশবাণী নিউজ আগরতলা / ফেসবুকে এ-আই-আর নিউজ আগরতলা এবং ইউ টিউবে আকাশবাণী নিউজ আগরতলা।

Subhansu Sukla:

ভারতীয় মহাকাশচারী এবং গ্রুপ ক্যাপ্টেন শুভাংশু শুল্লা বলেছেন, তরুণরাই দেশের মূল সম্পদ। শ্রী শুল্লা আজ নতুন দিল্লিতে Viksit Bharat Young Leaders Dialogue ২০২৬-এর অধিবেশনে বক্তব্য রাখছিলেন। তিনি তরুণদের স্থিতিশীল হতে এবং আত্ম-সংশয় থেকে বিরত থাকার পরামর্শ দেন। কেন্দ্রীয় যুব বিষয়ক ও ক্রীড়া প্রতিমন্ত্রী রক্ষা নিখিল খাডসে এবং ইসরোর বর্ষীয়ান বিজ্ঞানী প্রশান্ত মিশ্রও অনুষ্ঠানে উপস্থিত ছিলেন।

Fit India Sunday:

কেন্দ্রীয় ক্রীড়া মন্ত্রী ড. মনসুখ মান্ডাভিয়া আজ সকালে নতুন দিল্লিতে সাইকেলে ফিট ইন্ডিয়া সানডে-এর ৫৬তম পর্বে অংশগ্রহণ করেন। দেশের তরুণ প্রতিনিধি, যাঁরা বর্তমানে মর্যাদাপূর্ণ Viksit Bharat Young Leaders Dialogue-এ যোগ দিতে দিল্লিতে রয়েছেন, তারাও এতে অংশ নেন। ভারতীয় টেনিস তারকা লিয়েন্ডার পেস এবং কিংবদন্তি শাটলার পুলেলা গোপীচাঁদ এই ইভেন্টে অংশ নিয়েছেন। অনুষ্ঠানে ডাঃ মান্ডাভিয়া বলেন, সাইক্লিং ভারসাম্য শেখায় এবং নেতৃত্বে ভারসাম্য অপরিহার্য।

Akhshar Publication:

রাজ্যের প্রখ্যাত প্রকাশক সংস্থা অক্ষর পাবলিকেশন-এর উদ্যোগে আজ আগরতলা প্রেস ক্লাবে গ্রন্থ প্রকাশ অনুষ্ঠানের আয়োজন করা হয়। অনুষ্ঠানে বিভিন্ন লেখকের নয়টি বই প্রকাশিত হয়। অনুষ্ঠানে সভাপতিত্ব করেন রাজ্যের বিশিষ্ট সাংবাদিক সমিরন রায়। উপস্থিত ছিলেন বিশিষ্ট কবি কিশোর রঞ্জন দে, আকবর আহমেদ, সুমন পাটারি প্রমুখ।

Yuba Dibas- Dhalai:

আমবাসা রামকৃষ্ণ সেবা সদনের উদ্যোগে এবং বিবেকানন্দ যুব বিভাগ উপকমিটির সহযোগিতায় আজ বসে আঁকো প্রতিযোগিতার আয়োজন করা হয়। আগামীকাল জাতীয় যুব দিবস উপলক্ষে আয়োজিত এই প্রতিযোগিতায় মোট ১২১ জন ছাত্রছাত্রী অংশগ্রহণ করে।

Sishu Mela:

আগরতলার বড়দোয়ালী এলাকার নব অঙ্গীকার সামাজিক ও সাংস্কৃতিক সংস্থা আয়োজিত পাঁচ দিনের শিশু মেলা আজ থেকে শুরু হয়েছে। উদ্বোধন করেন ত্রিপুরা বিধানসভার উপাধ্যক্ষ্য রামপ্রসাদ পাল। উপস্থিত ছিলেন কর্পোরেটর সম্পা সরকার চৌধুরী সহ বিশিষ্টজনেরা।

Lal Bahadur Shastri:

আজ প্রাক্তন প্রধানমন্ত্রী লাল বাহাদুর শাস্ত্রীর মৃত্যুবার্ষিকী। উপরাষ্ট্রপতি সিপি রাধাকৃষ্ণন ভাইস প্রেসিডেন্ট এনক্লেভে আজ প্রয়াত প্রাক্তন প্রধানমন্ত্রী'র প্রতি পুষ্পস্তবক অর্পণ করেন। সামাজিক মাধ্যমে উপরাষ্ট্রপতি জানান, প্রাক্তন প্রধানমন্ত্রী ছিলেন একজন দূরদর্শী নেতা যার জীবন সরলতা, সততা এবং জাতির প্রতি উৎসর্গের উদাহরণ।

Blood Donation Mayor:

বনমালিপুর শ্রী শ্রী রামঠাকুর সেবামন্দিরের ৫০তম প্রতিষ্ঠা বার্ষিকী উদযাপন উপলক্ষে আজ আশ্রম প্রাঙ্গনে আয়োজিত রক্তদান শিবিরের উদ্বোধন করেন আগরতলার মেয়র দীপক মজুমদার। আশ্রমের মোহন্ত মহারাজ কালিপদ ভট্টাচার্য আশ্রমের ইতিহাস তুলে ধরে রক্তদাতাদের সুস্বাস্থ্য কামনা করেন। শিবিরে ৫৬ জন রক্তদান করেন।

Vivekananda Janmajayanti:

আগরতলা শহর দক্ষিণাঞ্চলের স্বামী বিবেকানন্দ ক্লাবের উদ্যোগে তিন দিন ব্যাপী স্বামী বিবেকানন্দ জন্মজয়ন্তী অনুষ্ঠানের আজ দ্বিতীয় দিনে মেগা স্বাস্থ্য

শিবির অনুষ্ঠিত হয়। পরে বিকালে দুটি পৃথক বয়স বিভাগে যোগাসন প্রতিযোগিতা হয়। সন্ধ্যায় হয় আবৃত্তি ও সংগীত প্রতিযোগিতা। আগামীকাল সমাপ্তি দিনে যুবা সংবর্ধনা ও পুরস্কার বিতরণী অনুষ্ঠান হবে।

Art competition:

পশ্চিম ত্রিপুরা জেলা প্রশাসন ও জেলা প্রশাসনের রিক্রিয়েশন ক্লাবের উদ্যোগে আজ ছবি আঁকা প্রতিযোগিতা অনুষ্ঠিত হয়। জেলাশাসক ডাঃ বিশাল কুমার এই অনুষ্ঠানে উপস্থিত ছিলেন। ছবি আঁকা প্রতিযোগিতায় ৪৫০ জন ছাত্রছাত্রী অংশ নিয়েছে।

Cricket- Ratan lal Nath:

প্রাক্তন প্রধানমন্ত্রী প্রয়াত অটল বিহারী বাজপেয়ীর স্মরণে আজ মোহনপুরে আয়োজিত অটল কাপ ক্রিকেট প্রতিযোগিতার উদ্বোধন করেন বিদ্যুৎ মন্ত্রী রতন লাল নাথ। উদ্বোধনী ভাষণে শ্রী নাথ রাজ্যের যুবকদের খেলাধুলা ও বিভিন্ন শরীরচর্চা কর্মসূচিতে অংশ নেওয়ার আহ্বান জানান। আজ প্রথম খেলায় ইশানপুর ব্রাইট স্কুল এনসিবি দলকে পরাজিত করে।

Weather:

আগামীকাল আকাশ আংশিক মেঘাচ্ছন্ন থাকবে। ভোরের দিকে রাজ্যের বিভিন্ন জেলার কিছু কিছু স্থানে ঘন কুয়াশা পড়ার সম্ভাবনা রয়েছে। আজ দিনের সর্বোচ্চ তাপমাত্রা ছিল ২৭ দশমিক ৫ ডিগ্রি সেলসিয়াস এবং সর্বনিম্ন ১৫ দশমিক ২ ডিগ্রি সেলসিয়াস। আগামীকাল দিনের সর্বোচ্চ তাপমাত্রা ২৬ ডিগ্রি সেলসিয়াস এবং সর্বনিম্ন ১৪ ডিগ্রি সেলসিয়াসের কাছাকাছি থাকতে পারে।
